

दिनांक 23.03.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेश मांय लोकसभा चुनाव रा पहला दौर मांय पर्चा दाखिल करण सारू दो कार्य दिवस बच्या-भाजपा अर कांग्रेस मांय बच्चोडी सीटा माथे उम्मीदवारां रा नाम तैय करण सारू विचार जारी।
- राज्य रा चार निर्दलीय विधायक भाजपा री हिमायत रो ऐलाण कीनो-पैली वाळा सांसद गोपाल सिंह समेत केई नेता भाजपा मांय शामिल व्ह्या।
- प्रदेश मांय होळी रो उमाव-राज्यपाल अर मुख्यमंत्री जनता ने शुभकामनावां दीनी।
अर
- बिजली बचावण रा मकसद ऊं आज अर्थ आवर-डे मनायो जा रह्यो है।

000

लोकसभा चुनाव रा पहला दौर रा तैत प्रदेश रा 12 निर्वाचन हलकां मांय हाल ताई 10 नामपाना दाखिल करी ज्या है। खास सियासी पार्टियां भाजपा अर कांग्रेस री ओर ऊं हाल ताई कोई उम्मीदवार पर्चा दाखिल नी कीनो है। हाल ताई जयपुर मांय तीन, जयपुर ग्रामीण मांय दो, झुंझुनू, सीकर, बीकानेर, गंगानगर अर दौसा लोकसभा हलकां मांय एक-एक पर्चा दाखिल करी ज्यो है। चुनाव रा पहला दौर सारू पर्चा दाखिल करण बाबत् अब महज दो कार्य दिवस बच्या है, जिण ने ध्यान राखता थकां मंगवार अर बुधवार ने कांग्रेस अर भाजपा रा उम्मीदवारां री ओर ऊं पर्चा दाखिल करण रा आसार है। भाजपा अर कांग्रेस राज्य री 25 मांय ऊं 15-15 सीटां माथे उम्मीदवारां रा नाम रो ऐलाण कर दीनो है। कांग्रेस री सहयोगी पार्टी भारतीय कम्युनिस्ट पार्टी सीकर ऊं उम्मीदवार रा नाम रो ऐलाण कर दीनो है। ई बीचे, भारतीय जनता पार्टी री केंद्रीय चुनाव समिति री आज नई दिल्ली मांय मीटिंग व्हेवण वाळी है, जिण मांय बच्चोडी सीटां माथे उम्मीदवारां रा नाम ऐलाण कर्या जावण रा आसार है। दूजी कानी कांग्रेस पार्टी मांय ई बच्चोडी सीटां माथे उम्मीदवारां रा नाम तैय करण सारू विचार चाल रह्यो है। ई बीचे लोकसभा चुनाव मांय 18 ऊं 19 साल उम्र रा करीब एक करोड़ 80 लाख नौजवान पहली दफा वोट देवेला। ऐडा नौजवानां ने बधावो देवण सारू सोशल मीडिया रे जरिये 'आई वोट फॉर श्योर' सरीखा केई अभियान चलाया जा रह्या है।

000

लोकसभा चुनाव मांय आदर्श आचार संहिता रा उल्लंघन रा मामलां माथे निगराणी राखण सारू बणायी ज्या 'सी-विजिल' एप माथे लारला 7 दिन मांय 1 हजार 515 शिकायतां दर्ज करायी ज्यी है, ज्यां मांय ऊं 546 शिकायतां तय मियाद मांय निपटा दीरीजी। मुख्य निर्वाचन अधिकारी प्रवीण गुप्ता बतायो के चुनाव आदर्श आचार संहिता लागू व्ह्यां पाछे

प्रदेश मांय रोजीना 200 ऊं बत्ती शिकायतां मिल रही है। 6 शिकायतां माथे जांच दलां अर रिटर्निंग अहलकारां कानी ऊं फ़ैसलो लियो जावणो है जद के 789 शिकायतां डीसीसी खारिज कर दीनी है।

गुप्ता बतायो के सी विजिल ऐप माथे आदर्श आचार संहिता रा उल्लंघन री सब ऊं बत्ती 241 शिकायतां टोंक जिला ऊं मिल ज्यां मांय ऊं 2 सौ 18 सही मिली।

000

लोकसभा चुनाव ऊं पैली प्रदेश रा चार निर्दलीय विधायक भारतीय जनता पार्टी री हिमायत करण रो ऐलाण कीनो है। आं मांय चित्तौड़गढ़ रा विधायक चंद्रभान सिंह, सांचौर रा विधायक जीवाराम चौधरी, हनुमानगढ़ रा विधायक गणेश राज अर बयाना रा विधायक रितु बनावत शामिल है। जयपुर मांय भाजपा रा प्रदेश कार्यालय मांय राख्यी ज्या कार्यक्रम मांय पैली वाळा सांसद गोपाल सिंह ईडवा समेत केई नेता भाजपा री सदस्यता लीनी। भाजपा ऊं बगावत कर र कोटपूतली ऊं विधानसभा चुनाव लडबा वाळा मुकेश गोयल, बस्सी ऊं चुनाव लडबा वाळा जितेंद्र मीणा, जालम सिंह रावलोत, विकेश खोलिया, सुखवंत सिंह, विजय मीणा अर दानाराम चौधरी ओजू भाजपा मांय शामिल व्हे गया। ई मौके राख्यी ज्या कार्यक्रम मांय भाजपा रा प्रदेश अध्यक्ष सी.पी. जोशी समेत पार्टी रा केई नेता मौजूद हा। दूजी कानी राज्य रा पैली वाळा मुख्यमंत्री अशोक गहलोत जालौर-सिरोही लोकसभा हलका ऊं कांग्रेस रा उम्मीदवार वैभव गहलोत री हिमायत मांय आज राख्यी ज्या कार्याक्रमां मांय सिरकत कीनी।

000

वोट देवण बाबत् जाग जगावण सारु राज्य मांय न्यारा-न्यारा कार्यक्रम राख्या जा रह्या है। **जोधपुर** मांय महिला अर बाल विकास विभाग अर महिला अधिकारिता विभाग री ओर ऊं आज कलक्ट्रेट परिसर ऊं पावटा सर्किल, हाईकोर्ट रोड, नई सडक चौराहा व्हेती थकीं घण्टाघर ताई स्कूटर-मोटरसाइकिलां री रैली निकाली ज्यी। **जालौर अर सांचौर** जिलां री तवाव, जोडवाडा, भीनमाल, सायला, सांचौर, बागोड़ा, चितलवाना, सरनाऊ अर रानीवाडा उपखंड री ग्राम पंचायतां मांय स्वीप कार्याक्रमां री कड़ी मांय महिलावां लूर नाच रे मार्फत वोट जरुर देवण री अरज कीनी।

बूंदी मांय मोरडी पाडा रा मदरसा दरसूल इस्लाम मांय शिविर लगा र विद्यार्थियां रा पिरवार वाळां ने वोट देवण ऊं जुड़ी जाणकारियां दीरीजी अर वोट जरुर देवण री अपील करी ज्यी। भीलवाडा मांय जिला निर्वाचन अधिकारी विद्यार्थियां अर वां रा मायतां ने वोट जरुर देवण री सौगंध दिरायी।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

000

प्रदेश मांय होळी रे मौके हर तरफ उमाव निजर आ रह्यो है। काल होळी मंगळेला अर सोमवार ने धुलंडी रे मौके रंग-गुलाल ऊं होळी खेळी जावेला। बाजारां मांय गुलाल अर पिचकारियां री दुकानां सज ग्यी है। बाजारां मांय फूलां ऊं बणायी ज्यी गुलाल अर रंगां री खूब ब्रिकी व्हे रही है। न्यारा-न्यारा संगठनां री ओर ऊं होळी रे मौके पाणी बचावण सारू अभियान ई चलायी ज्यो है। बीकानेर मांय ई होळी रे मौके खास उमाव निजर आ रह्यो है। पेश है म्हाणा खबरनवीस री रपट—

.....
अलवर मांय ई सेठ-सेठाणी रो नानकशाही स्वांग निकाळी ज्यो। शहर रा काशीराम चौराहा ऊं मंत्री संजय शर्मा स्वांग ने रवाना कीनो। स्वांग निकाळबा री रीत राजा-रजवाड़ा रा बगत ऊं ई चली आ रही है।

चूरू मांय ई तीन दिन रो फागोत्सव आज सरू व्हयो। म्हाणा खबरनवीस बतायो के लोक कलाकार बांसुरी री तान, चंग-ढप अर ढोल नगाड़ा बजा र नाच रह्या है।

.....
होळी रे मौके राज्य मांय मिंदरां समेत न्यारी-न्यारी ठौड़ां फागोत्सव मनाया जा रह्या है। जयपुर रा गोविन्ददेव जी मिंदर मांय आज ई फागोत्सव कार्यक्रम राख्यी ज्यो। राज्यपाल कलराज मिश्र होळी अर धूलण्डी रे मौके जनता ने बधाई दीनी है। वां रा संदेश मांय राज्यपाल कह्यो के ओ त्योंहार भक्त प्रहलाद री भक्ति री जीत रा रूप मांय बुराई माथे अच्छाई री जीत री निशाणी है। वे मिल-जुल र होळी मनावण री अपील कीनी। मुख्यमंत्री भजनलाल शर्मा ई होळी री बधाई अर शुभकामनावां दीनी। वे जनता ऊं सामाजिक बुराइयां अर दुभांत मिटावण रो संकल्प करण बाबत् कह्यो। मुख्यमंत्री सगळां ऊं कुदरती रंगां ऊं होळी खेलण अर पाणी सोच-समझ र काम लेवण री अरज ई कीनी। पुलिस महानिदेशक यू. आर. साहू ई जनता ने होळी री शुभकामनावां दीनी है।

000

जलदाय विभाग धूलंडी रे मौके जयपुर शहर मांय पीवण रा पाणी री बत्ती पूर्ति री व्यवस्था कीनी है। विभाग रा अतिरिक्त मुख्य अभियंता अमिताभ शर्मा बतायो के धूलंडी रा दिन बीसलपुर बंधा ऊं 50 एमएलडी और पाणी री पूर्ति करी जावेला। वे बतायो के दोपहरां पाछे साढे 12 बज्यां ऊं डोढ बज्यां ताई शहर रा न्यारा-न्यारा हलकां मांय पाणी री पूर्ति करी जावेला।

000

देश री आजादी री लड़ाई मांय महान योगदान देवण वाळा शहीदां भगतसिंह, सुखदेव अर राजगुरु ने आज वां री शहादत रा दिन सिरधाभाव सागे याद कर्या जा रह्या है। आज ही रा दिन साल 1931 मांय लाहौर षडयंत्र मामला मांय आं तीन ई नौजवानां ने वां बगत रा ब्रितानी हुक्मरान भारत री आजादी सारू काम करण रा आरोप मांय फांसी दे दीनी ही। ई मौके राज्य मांय ई न्यारा-न्यारा कार्यक्रम राख्यी ज्यो।

सवाईमाधोपुर मांय शहीद स्मारक माथे राख्यी ज्यो कार्यक्रम मांय एन.सी.सी. समेत न्यारा-न्यारा संगठनां रा सदस्य फूल चढ़ा र तीन ई शहीदां ने याद कीना अर वां री जीवनी रा बारा मांय चर्चा करी ज्यी। भरतपुर मांय किला रा शहीद स्मारक माथे राख्यी ज्यो श्रृद्धांजलि कार्यक्रम मांय देश री आजादी री लड़ाई मांय तीन ई शहीदां रा काम रा बारा मांय विचार जतायी ज्यो। श्रीगंगानगर मांय भगत सिंह चौक माथे

श्रद्धांजलि कार्यक्रम राख्खी ज्यो। टोंक मांय भगत सिंह सर्किल माथे राख्खी ज्यां खास कार्यक्रम मांय तीन ई शहीदां ने याद करी ज्या। भीलवाड़ा मांय सूचना केंद्र ऊं मैराथन दौड़ राख्खी ज्यी।

000

बिजली बचावण अर बिजली रा महत्त्व अर पर्यावरण री हिफाजत रा बारा मांय जाग जगावण रा मकसद ऊं आज अर्थ आवर डे मनायो जा रह्यो है। ई मौके जयपुर रा राजभवन मांय ई रात साढे आठ ऊं साढे 9 बज्यां ताई बिजली रा गैर—जरूरी उपकरण बंद राख्खा जावेला। राज्यपाल कलराज मिश्र जनता ऊं एक घंटा सारू गैर—जरूरी लाइटां बंद राख र अर्थ आवर डे रे मौके बिजली बचावण रा काम मांय सिरकत करण बाबत् कह्यो है।

000

होळी ने ध्यान राखता थकां स्वास्थ्य विभाग सावचेत व्हे ग्यो है । भरतपुर अर डीग जिलां मांय अभियान चला र मिठाइयं अर खाण—पीण री चीजां री दुकानां समेत 32 ऊं बत्ती ठौड़ां जांच करी ज्यी। **शुद्ध आहार मिलावट पर वार** अभियान रा तहत आज बूंदी रा लाखेरी मांय मिठाइयां री दुकानां ऊं नमूना लिया ज्या अर खराब मिठाइयां मौके ई नष्ट करवायी ज्यी।

000